

9. august 2013

UKA 2013/31

Inatsisartut suleriaasianni § 33, imm. 1 naapertorlugu aalajangiiffigisassatut siunnersuut una saqqummiuppara:

**Kalaallit Nunaanni nammineq piumassuseq naapertorlugu upalungaarsimasunik naalagaaffik suleqatigalugu pilersitsisoqarsinnaanera tamatumalu sunniutigisinnaasaasa misissorneqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartuni ilaasortaq Doris Jakobsen, Siumut)

**Tunngavilersuut:**

Inatsisartuni Folketingimilu sulininnut atatillugu Islandimi nammineq piumassuseq naapertorlugu upalungaarsimasut misilittagaqarfiginerat misissornikuuara. Misilittakkat ataatsimut isigalugit tamarmik pitsaasuupput. Upalungaarsimasut ornitassaat isorartuallaartillugit aqutigisassallu sapernarsitillugit, Islandimiut namminneq piumassutsiminnik nunaqqatiminnik takornarianilluunniit annaaniagassaqtartillugu ikiuuttarnerat sutigit tamatigit iluaqutaavoq.

Upalungaarsimasut sineriammi alapernaarsuinermit politiit qatserisartullu suliassaat ilanngullugit upalungaarsimatitanut ikiortaaqqartarput. Tamannalu Islandimut annertuumik iluaqutaavoq: Namminneq piumassutsiminnik upalungaarsimasut upalungaarsimatitanut nalinginnarnut qanimut suleqataapput. Nunami isorartuumi ikittuinnarnillu innuttalimmi innuttaasut piginnaasaat Islandimi pitsaanerpaamik atorluarneqarput. Islandimi upalungaarsimasut agguaqatigiissillugu ullormut pingasoriarlutik kalerrinneqartarput.

**Katinnaneq eqqumaffigalugu**

Islandimi namminneq piumassutsiminnik upalungaarsimasut aningaasarsiaqarneq ajorput aningaasartuutillu 75 procentii namminneq isumagisarlugit. Iffiukkanik, qummoroortartunik aalisakkanillu panertunik allanillu tuniniaasarnermikkut aningaasanik katersisarput. Sumiiffimmi najugallit tunniusimanerat tassarpiaavoq qiteritinneqartoq – tamannalu kalaallit aamma ilisarnaatigaarput.

Kalaallit Nunaanni sakkortuumik ataastimuussueqarpugut. Kikkut tamarmik imminnut ilisarisimapput ikioqatigiillaqqillutillu. Ikiortariaqartoqartillugu nunaqarfimmiut illoqarfimmiullu ikioqatigiittarput. Nammineq piumassuseq naapertorlugu upalungaarsimatitaqalernikkut, nukiit atorluarneqarsinnaasut aaqqissuussamik atorneqarsinnaalissapput.

Arlaannik ikiortariaqartoqalersillugu piffissaq annaaneqartartoq taamatut pinngitsoorneqarsinnaavoq, inuimmi annaanneqarneqarsinnanannut minutsialuit apeqqutaasinnaasarmata.

Islandip Kalaallit Nunaatalu isorartunertik assigiissutigaa, amerlanerusunilli aamma assigiissuseqarpugut.

Ujarlernerni annaassiniarnernilu namminneq piumassutsiminnik upalungaarsimasut namminneq biilitik, qamuteralaatitik angallatitillu atortarpaat. Sumiiffinni najugallit avatangiisitik pillugit ilisimasaqarnerukkajuttarput, taamaalillutillu ikortariallit piaarnerusumik tikissinnaasarlugit. Kalaallit Nunaanni tamani piniartut, aalisartut allarpassuillu sumiiffimmini pissutsit pillugit aamma ilisimasaqarluartuupput, tamatumalu saniatigut angallataatillit, qamuteralaatillit qamutillillu amerlallutik.

Islandimi namminneq piumassutsiminnik upalungaarsimasut pisariaqartitaat naapertorlugit pikkorissarneqartarput. Kalaallit Nunaanni aamma namminneq piumassutsiminnik upalungaarsimasut taamatut ilinniartinneqartarnissaat pissusissamisuusaaq.

Siunnersuummi uani tassa siunertarineqarpoq inuiaat kalaallit ikiuerusussusaasa aaqqissorluakkamik upalungaarsimanermi tapertaasinnaanerisa misissorneqarnissaat, Kalaallit Nunaanni avatangiisit inuillu isumaginissaat qulakkeerniarlugu.

### **Siunnersuutip aningaasatigut allaffissornikkullu pisortanut kinguneqaatissai**

Misissuinissaq eqqarsaatigalugu siunnersuut Namminersorlutik Oqartussanut allaffissornikkut aningaasartuutaanissaa naatsorsuutigineqarpoq. Taamannak suliaqarneq AC-tut atorfillip ukiup affaaniit ukiup ataatsip iluani sulineranik naleqassasoq naatsorsuutigineqarpoq, aningaasanngorlugu 200-500.000 kr.-nit akornanni naleqassangatinneqarluni. Misissuineq allaffissornikkut aningaasartuutissatut naatsorsuutaareersut iluanni pingaarnersiuinikkut naammassineqarsinnaavoq.

### **Siunnersuutip namminersorlutik inuussutissarsiortunut allaffissornikkut aningaasatigullu kinguneqaatissai**

Soqanngilaq.

**Siunnersuutip innuttaasunut allaffissornikkut aningaasatigullu kinguneqaatissai**  
Soqanngilaq.